

Schnitzubänk 2007 Vo de Schwarze

D' Schnitzubänker si hür rar,
Das isch truurig aber wahr.
Anstatt i de Beize z'hocke,
Tüe si a der Börse zocke!

Mir hei keni Theme, hei keni Gschichte.
Hei ke Idee, drum gits o nüt z'brichte.
Mir giiine echli, und schlafe i.
Das isch d'Bundesratssitzig vom Mittwoch gsi.

Heit Dir scho z'nöischte Mitglied gseh
Vor ehrewärte SVP?
Ihres Niveau – mir wei das nid verschwige –
Isch dank däm Geissbock düttelech gstige!

Elf Meter! das si im Wankdorf zäh,
Damits bim Penalty o mal äs Gool cha gäh.
Dä Punkt chönnt no viel nächer si,
D' Schwiizernati tät glich kene dri!

Rouke verbote – das isch gsung!
Sufe verbote – da blibsch jung!
Mir läbe im Paradies uf Ärde.
Ungsung isch itz nur no z'Starbe!

Nei, nei, nei, nei, nei, nei, nei!
Nei, nei, nei, nei, nei, nei, nei!
Mir säge nüt – denn bitte sehr,
Mir si Verwaltigrät vor Ex-Swissair.

Z' Luoberhorn wird vom Streller gwunne.
Der Frei isch schnäll – o bi Sunne.
Der Yakin git im Slalom Gas.
Nächsch Winter fahrt me drum uf Gras!

Damit ds Gras am Hundschof o cha spriesse,

Mueschs nid nume chräftig giesse.
Nei fürs Louberhorn sölls üs nid röie,
Drum tüe mir no chli Dünger streue!

Alli Schneekanone, mi Gotts tüüri,
Frässe glich viel Strom wie d'Stadt Züüri!
Der Schnee, dä bruchts, da gits nüt z'säge.
Ohni Zürcher chönnt me gäbig läbe!

D's Bundeshuus wird tüür saniert.
Doch der Erfolg isch garantiert.
Denn 2008 – mir fröie üs druf –
Geit dert z'nöie Alkistübli uf!

Der Tschäppät beschliesst, falls är je sött stärke,
Möchte är gärn äs Ängli wärde!
Aber Alex, da bruchsch doch ä Heiligeschiin,
U nid so ne blöde Baldachin.

Dä komisch Typ vom Albisgüetli,
Mit däm schrege Russehüetli,
Isch doch kriminell u nid integriert.
Dä wird nach Moskau abserviert!

Der Fuchs nimmt ab als Wahlkampf-Gäg,
Nünzäh Kilo si scho wäg!
Itz nur no hundert – mir gloube dra,
De isch dä ändlech nümme da!!

Tram, Tram, Tramderidi,
Z' Bümpliz stigt ke Chnoche i,
Kene wott äs Billiet choufe,
Bisch z'blöd zum Fahre, muesch halt loufe!